

- प्रधानमंत्री नरेन्द्र मोदी आज नई दिल्ली मांय साढ़े 33 हजार करोड़ रुपया री केई विकास परियोजनावां री सौगात दी।
- मुख्यमंत्री भजनलाल शर्मा चूरु मांय गौरव सैनानी समारोह ने संबोधित कर्यो-राजस्थान री संस्कृति ने वीरता री प्रेरणा देवण वाळो बतायो।
- महिलावां रो सम्मान, सुरक्षा अर बरोबर मौका अर वां री उपलब्धियां रो जश्न मनावण खातिर अंतर्राष्ट्रीय महिला दिवस रे मौके केई कार्यक्रमां रो आयोजन।
- मौसम महकमो 10 अर 11 मार्च ने राज्य रा कुछेक ठौड़ां माथे हीटवेव चालणे री आस जतायी।
- आईसीसी टी-ट्वेंटी क्रिकेट वर्ल्ड कप री खिताबी जंग अब सूं कुछ ही देर मांय भारत अर न्यूजीलैंड रे बीचे व्हेली।

000

प्रधानमंत्री नरेन्द्र मोदी आज नुवी दिल्ली मांय लगेटगे साढ़े 33 हजार करोड़ रुपया री केई विकास परियोजनावां रो उदघाटन अर शिलान्यास कर्यो। इण मौके माथे श्री मोदी कयो कि राष्ट्रीय राजधानी मांय सुविधावां अर बुनियादी ढांचा ने लगेतार मजबूत अर विस्तारित कर्यो जा रियो है। वणा कयो कि आं परियोजनावां सूं आधारभूत ढांचो मजबूत व्हेला। इण रे साथे ही सम्पर्क बधने सूं लोगां री जिन्दगी सोरी व्हेला।

000

प्रधानमंत्री नरेन्द्र मोदी काल सबका साथ-सबका विकास : जनता की आकांक्षाओं को साकार करना मुद्दा माथे पोस्ट बजट वेबिनार ने सम्बोधित करेला। इण रे तैत शिक्षा अर कौशल विकास, स्वास्थ्य तथा आयुष, पर्यटन अर आतिथ्य सत्कार जेड़ा न्यारा-न्यारा खेतरां मांय केई सत्र राख्या जावेला। बजट रे पाछे वेबिनार श्रृंखला रे तैत स्वास्थ्य अर परिवार कल्याण मंत्रालय री कानी सूं इण रो आयोजन कर्यो जा रियो है। इण मांय एक खास सत्र मांय वृद्धावस्था अर संबद्ध देखभाल सेवावां ने भेळा करता थकां इण खातिर मजबूत ईको-सिस्टम माथे भी चर्चा करी जावेली।

000

पश्चिम एशिया मांय संघर्ष सरू होणे रे पाछे अबे तांई खाड़ी खेतर सूं 52 हजार सूं बत्ती भारतीय नागरिकां ने स्वदेश लायो जा चुक्यो है। विदेश मंत्रालय रा प्रवक्ता रणधीर जायसवाल जाणकारी देवता थकां बतायो कि सरकार ताजा घटनाक्रम माथे लगेतार निजर राख री है।

000

भारतीय सेना री ओर ऊं आज चूरु मांय गौरव सैनानी जळसो राख्यो गयो। जिला खेल स्टेडियम मांय व्हीया इण जळसा मांय हजारों री तादाद मांय पैली वाळा सैनिक, वीर नारियां अर वीरांगनावां शिरकत करी। इण मौके माथे मुख्यमंत्री भजनलाल शर्मा कयो कि राजस्थान री संस्कृति सदां ही वीरता री प्रेरणा देवे है। शेखावाटी रा वीर ने राजस्थान रो नाम अमर करयो है। जळसा मांय मुख्यमंत्री चूरु रा जिला खेल स्टेडियम रो नाम लेफिटनेंट जनरल सगत सिंह राठौड़ रे नाम माथे करया जावण री घोषणा भी करी। जनरल सगत सिंह 1971 रा भारत-पाकिस्तान युद्ध मांय खासे साहस रो परिचय दियो हो।

000

सप्तशक्ति कमान रा कमाण्डर लेफिटनेंट जनरल मनजिंदर सिंह कयो कि गौरव सैनानी जळसो आपसी जुड़ाव अर जिम्मेदारी रो प्रतीक है। जळसे रे चालता पैली वाळा सैनिकां ने सम्मानित करयो गयो अर वां ने रोजगार सूं जोड़ने खातिर नियुक्ति पाना सूंप्या गया।

000

राष्ट्रपति द्रौपदी मुर्मू कह्यो है कि मौका अर सहयोग मिलने सू महिलावां हर खेतर मांय ऊंचाइयां छू सके है। आज अंतर्राष्ट्रीय महिला दिवस रे मौके माथे नुवी दिल्ली मांय राख्यी ज्या जळसा मांय राष्ट्रपति कयो कि आज महिलावां हर खेतर मांय अग्रणी भूमिका निभा री है। भारत महिलावां रे नेतृत्व वाळे विकास री दिशा मांय तेजी सू आगे बध रियो है। राष्ट्रपति मुर्मू बेटी बचाओ-बेटी पढ़ाओ, पीएम मुद्रा योजना अर मिशन शक्ति सरीखी योजनावां रे बारां मांय बताता थकां कयो कि इण सू महिलावां रो सशक्तिकरण व्हयो है।

000

महिला अर बाल विकास मंत्री अन्नपूर्णा देवी इण मौके माथे कयो कि महिलावां विकसित भारत री नींव है। अंतर्राष्ट्रीय महिला दिवस महिलावां रे संकल्प, समर्पण अर उपलब्धियां रो उच्छव है। इण सू पेल्या महिला अर बाल विकास मंत्रालय री कानी सू आज नुवी दिल्ली मांय शक्ति वॉक राख्यी ज्यी। वठी ने अंतर्राष्ट्रीय महिला दिवस रे मौके माथे राज्य स्तरीय महिला सम्मेलन हनुमानगढ़ मांय राख्यो गयो। धानमंडी मांय व्हीया इण कार्यक्रम मांय मुख्यमंत्री भजनलाल शर्मा भी शिरकत करी। इण मौके माथे वणा 1 हजार 8 करोड़ रुपया रा विकास कामां रो लोकार्पण अर शिलान्यास कररयो। उपमुख्यमंत्री अर महिला बाल विकास मंत्री दिया कुमारी जळसे ने संबोधित करता व्हीया महिलावां अर बालिकावां ने आत्मनिर्भर बणने अर आगे बधणे खातिर प्रोत्साहित कर्यो।

000

प्रदेशभर मांय अंतर्राष्ट्रीय महिला दिवस रे मौके केई कार्यक्रम व्हीया। अलवर, डूंगरपुर, चूरू, करौली, सिरोही अर दूजी जगहां माथे महिला सम्मान जळसो राख्यो गयो। वठी ने झुंझुनू आज सू राजसखी राजीविका मेळा री सरूआत व्ही। मेळे मांय 110 अग्रणी महिलावां ने टैबलेट बांट्या गया। डीग मांय जिला कलेक्टर उत्सव कौशल आशा सहयोगिनी अर आंगनबाड़ी कार्यकर्ता अर होशियार छात्रावां ने सम्मानित कर्यो। पुलिस महानिदेशक राजीव शर्मा वीडियो संदेश मांय कयो कि महिलावां री सुरक्षा अर सम्मान सारू राजस्थान पुलिस प्रतिबद्ध है।

000

मौसम विभाग 10 अर 11 मार्च सू राज्य रा कुछेक ठौड़ां मांय हीटवेव चलणे री आस जताई है। खासतौर सू पश्चिमी राजस्थान रे कुछेक जगावां मांय हीटवेव री आशंका है। आवता दो-तीन दिनां मांय तापमान मांय 2-3 डिग्री सेल्सियस री बघोतरी व्हे सके है। मौसम केन्द्र जयपुर रा निदेशक राधेश्याम शर्मा बतायो कि केई जिलां मांय सूरज री तपिश बध ग्यी है अर गर्म हवावां भी चालण लागी है। केई जिलां मांय 39 डिग्री सेल्सियस रे करीब पहुंच गयो है।

000

बाड़मेर, बीकानेर, श्रीगंगानगर अर जोधपुर मांय झुलसाणे वाळी गर्मी रो असर देखण ने मिल रियो है। पाली, चित्तौड़गढ़, सलूमबर, चूरू, उदयपुर, अजमेर अर कोटा मांय भी गर्मी रो असर तेज व्हे गयो है। राजधानी जयपुर मांय भी लारला दो-तीन दिनां मांय पारे मांय उछाल दर्ज करयो गयो है। दिन रे बगत तापमान रो असर बाजारां मांय भी निजर आवण लाग्यो है। हालांकि दिन मांय तेज गर्मी रे बावजूद रात रे बगत लोगां ने अबार राहत मिल री है। घणखर ठोडां माथे रात रो पारो 20 डिग्री सेल्सियस सू नीचे बण्योड़ो है।

000

आईसीसी टी-ट्वेंटी क्रिकेट वर्ल्ड कप रो फाइनल मुकाबलो आज भारत अर न्यूजीलैंड रे बीच व्हेला। अ खिताबी जंग अहमदाबाद रे नरेन्द्र मोदी स्टेडियम मांय अबे सू थोड़ी देर मांय सरू व्हेला। 29 दिन 54 मैच अर केई रोमांचक मुकाबलां पाछे आज टी-ट्वेंटी विश्व कप रो कारवां आपरे अंतिम पड़ाव माथे है। सूर्य कुमार यादव री कप्तानी वाळी टीम इंडिया खिताब बरकरार राखणे अर तीजी बार ट्रॉफी जीतर इतिहास रचने रे इरादा सू मैदान मांय उतरेली। वठी ने मिचल सेंटनर री अगुवाई मांय कीवी टीम टी-ट्वेंटी वर्ल्ड कप खिताब जीतने रे मकसद सू मुकाबलो करेली। मैच ने लेर लोगां मांय खासो उच्छास है। दोन्यू टीमां टी-ट्वेंटी फाइनल मुकाबले मांय पहली बार भिड़ेली।

भारत मौजूदा चैंपियन है। वठी ने न्यूज़ीलैंड री टीम पहली बार टी-ट्वेंटी वर्ल्ड कप खिताब जीतने रे मकसद सूं मैदान मांय उतरेली।

000

नागौर जिला मांय बापोड़-बासनी रोड माथे आज सुंवारे एक मिनी बस पलटने सूं 15 जणा घायल व्हे गया। ए शादी समारोह मांय भेळा होवण खातिर बापोड़ सूं नागौर जा रिया हा। हादसो अचानक सड़क माथे आया एक आवारा पशु ने बचावण री कोशिश मांय व्हीयो। घायलां ने बासनी अर नागौर रा सफाखाना मांय भर्ती करायो गयो है। अठी ने जयपुर रा बस्सी इलाका मांय बीती रात एक शादी समारोह खातिर जा रिया लोगां रा समूह रे बीचे एक बेकाबू कार घुस ग्यी, जिण सूं 16 जणा घायल व्हे गया। इण मांय सूं 7 घायलां ने जयपुर रा एसएमएस सफाखाना मांय भर्ती करायो गयो है।

000

प्रधानमंत्री नरेन्द्र मोदी 29 मार्च ने आकाशवाणी रे "मन की बात" कार्यक्रम मांय आपरा विचार साझा करेला। अ इण मासिक रेडियो कार्यक्रम री 132वीं कडी व्हेला। इण रे खातर सुझाव टोल-फ्री नम्बर 1800-11-7800 माथे भेज्या जा सके है। नरेन्द्र मोदी एप अर माय जीओवी ओपन फोरम रे मार्फत सूं भी विचार भेज्या जा सके है। ए सुझाव 27 मार्च ताई मंजूर कर्या जावेला।

000